



ARRASATEKO UDALA
AYUNTAMIENTO DE MONDRAGÓN



GENERO IKUSPEGIA UDAL POLITIKAN TXERTATZEKO MOZIOA

Hilketa eta eraso fisiko matxistak, biolentzia matxisten eredu argiena eta gaur egun famatuenetakoak dira, hedabideetan zabalera handiena dutenak. Biolentzia hauek ikusgarrienetakoak diren arren, ez zaigu ahaztu behar beste hainbat biolentzia eta ezberdintasun ugari eta sakonen isla direla, izeberg-aren tontor bezala, sistema patriarkalak hartzen dituen formetako batzuk. Sistema hau mantentzen laguntzen duten desberdintasunak era askotan daude erroturik gure gizartean, kulturean, lan munduan, esparru publikoetan, bizitza pribatuan... eta hauen eraginak biolentzia fisikoa bezain larriak dira, emakumeen eskubideak zapaldu eta desberdintasun egoeran mantentzen bait dituzte.

Jazarpen honen ardatzetako bat ezberdintasun ekonomikoa da, emakumeak mendekotasun ekonomiko egoeran mantentzen dituenak, bai lan munduko desoreken ondorioz eta baita bizitza pribatuko esparruetan ematen diren dinamika ezberdinekin. 2016an adibidez, emakume bakoitzak gizonezkoek baino 2 ordu gehiago joratu ditu familiaren zaintza eta etxeko lanetan. Enplegu dirusarreretan berriz, lan berbera eginez batezbeste %24 gutxiago jasotzen dute. Berdina kobratu ahal izateko 80 egun gehiago egin beharko lukete lan. Guzti hau kasu gehienetan enplegu prekarioagoak eta lan baldintza eta eskubide urriagoak jasaten dituztela ahaztu gabe. Arrasaten bertan, emakumeen langabezi tasa gizonezkoena baino %5 handiagoa da, ehundaka emakume langabe gehiago daude gizonezko langabeak baino.

Emakumeen burujabetze eta autonomia ekonomikoaren konkista oinarrizkoak dira berdintasun erreal bat lortzeko, arlo ekonomikoa giltza izaten bait da independentzia pertsonala izan eta ekiteko bizitzaren beste alorretan.

Helburu hau lortzeko, udal politikak sustraietatik begiratu behar dira, hausnarketa sakon eta zorrotz bat eginez, politiken eragin ezberdinak kontuan hartuz, genero ikuspegia txertatuz. Araudiak, ordenantzak, aurrekontuak... udal erreminta guzti hauek eragin zuzena dute herritarren eguneroko bizitzan eta ondorioz, emakumeen bizi baldintzetan. Udal erreminta hauek aztertuz eta baloratuz jakin ahal izango dugu zein eragin duten genero ikuspegitik, ea berdintasuna inplementatzen laguntzen duten edo ez. Behin azterketa egina, ahalmena izango dugu politika eraginkorrak

oinarri finko batetik egiteko, emakumeek jasaten dituzten ezberdintasunak era zehatz baten landu eta konponduz gizarte berdintsuago bat eraikitzeko.

Eudel erakundeak proiektu bat martxan dauka udalherrien mailan, instituzioen baitan ematen diren araudi, protokolo eta erreminten genero eragina hausnartu eta genero ikuspegia txertatzeko xedearekin. Urte hontako Azaroan aurreikusita dago proiektu honen lehen atala amaitzea eta bertan jaso ahal izango dira emaitzak eta landu beharreko lerroak. Positiboki eta beharrezkotzat baloratzen dugu esfortzu hau eta lehen atal hori bukatu bezain laster, Arrasateko udalaren atxikimendua lehentasun bat izango litzateke. Lan ildo honi jarraituz, Baleike udal taldetik ezinbestekotzat daukagu Arrasateko talde eta eragile feministen aberastasuna aintzakotzat hartu eta lan-keta hauetan instituzioekin batera elkartasunez lan egitea, prozesu eta proiektu hauetan eragile feministak barneratuz.

Arrazoi guzti hauengatik, Baleike Udal Taldeak ondorengo puntuak proposatzen ditu, udalbatzarrak bozkatu ondoren udal gobernuak aurrera eramateko konpromezua hartuz:

- 1) Foro bat eratuko da, onarpen ofizialarekin, parte hartu nahi duten eragile feministen eta berdintasun sailaren arteko elkarlan eta koordinazioa indartzeko. Foro honetako parte hartzaile guztiek izango dute ahotsa eta bozkatzeko ahalmena.
- 2) Foro honetan udal erakundeko politika eta erabakien genero eragina ikuskatu eta baloratuko da, emakumeen burujabetza, autonomia ekonomikoa, ordezkaritza sozial eta politikoa sustatuz.
- 3) Arrasateko Udala lehen bait lehen atxikituko da Eudel erakundeak genero eragina lantzen dituen proiektuetan, berdintasun sail eta eragile feministen arteko foroa prozesu hauetan barneratuz.
- 4) Garrantzia bereziaz landuko dira udalaren enplegu politikak, Arrasaten egunean dagoen lan munduko ezberdintasuna aztertuz eta hau konpontzeko ekintzak landuz.